

ULASAN BUKU/*BOOK REVIEW*

Islam Hadhari : Pendekatan Pembangunan Peradaban Oleh Mahmood Zuhdi Hj. Ab. Majid at al. Kuala Lumpur : Yayasan Dakwah Islamiah Malaysia. 2008. 793 hlm. Diulas oleh Jawiah Dakir.

Abstrak

Islam Hadhari adalah satu gagasan Negara dalam usaha untuk membawa umat Islam ke arah kemajuan dan pembangunan yang seimbang. Ia merupakan satu pendekatan khusus kepada aspek pembangunan yang memfokus kepada pembinaan tamadun ummah yang digarap dengan berpandukan al-Qur'an dan al-sunnah. Tujuannya adalah untuk mempertingkatkan mutu dan pencapaian ummah melalui sepuluh pendekatan khusus yang merangkumi aspek spiritual, fizikal dan mental.

Dewasa ini, disamping berbagai kejayaan, kemajuan dan kegemilangan yang dicapai oleh umat Islam, terdapat juga berbagai krisis, masalah dan kegagalan yang melanda mereka di peringkat Negara dan global. Sebagaimana yang ditekankan oleh Mahmood Zuhdi dalam artikel pendahuluan buku ini, kegagalan umat Islam dalam mencapai kemajuan yang sepatutnya seperti bangsa-bangsa lain sukar dinafikan. Umat Islam masih jauh ketinggalan dan gagal dari segi pemikiran, keilmuan, perekonomian dan lain-lain. Disamping itu, umat Islam juga menghadapi cabaran di peringkat antarabangsa dengan globalisasi, penjajahan pemikiran dan budaya asing yang bukan sahaja boleh merosakkan, tetapi juga boleh memecahbelahkan dan memporakperandakan umat Islam. Umat Islam menurut beliau perlu kepada perubahan positif yang berasaskan al-Qur'an dan al-Sunnah untuk kembali mencapai peradaban yang pernah suatu ketika dulu dinikmati dan kini hanya tinggal dalam lipatan sejarah. Beliau juga menerangkan berbagai pendekatan untuk mencapai ketamadunan yang antara satunya saling berkait. Pendekatan tersebut ialah pendekatan politik, pendekatan intelektual, pendekatan akidah, pendekatan dakwah dan pendekatan ketamadunan atau *hadharah*. Di Malaysia pendekatan *hadharah* atau ketamadunan telah mempengaruhi dasar dan pelaksanaan nilai-nilai Islam sejak awal kemerdekaan lagi.

Kini ia merupakan satu perancangan jangka panjang yang serius bagi memenuhi keperluan umat Islam mencapai ketamadunan yang sewajarnya.

Keimanan dan ketakwaan kepada Allah menjadi tunggak pendekatan untuk mencapai ketamadunan umat Islam yang digarap melalui pendekatan Islam Hadhari di Malaysia kini. Mohamad Kamil Hj. Ab. Majid membicarakan pendekatan ini dengan menghidangkan senario dunia masa kini sebagai mukaddimahnyanya. Umat Islam hari ini boleh disifatkan sebagai ‘melukut ditepi gantang’ setelah melalui zaman kegemilangan pada millennium kedua khususnya pada abad-abad terawal Islam. Umat Islam menghadapi Barat yang sebelum ini mundur dan tertinggal, kini tiba-tiba bangun dan maju setelah berinteraksi dan menimba kemajuan daripada masyarakat Islam dahulu. Sampai bilakah umat Islam mahu menjadi penonton dan kadang kala bersorak seronok dengan kejayaan dan kemajuan yang dicapai oleh Barat? Barat juga mempromosikan kemajuan dan ketamadunan mereka dalam segenap aspek, terutama kemajuan fizikal dan perubahan pemikiran yang menyeleweng. Antara lainnya mereka mempromosikan hak asasi manusia, demokrasi dan pembebasan wanita yang mana terselit di dalamnya unsur-unsur yang menyeleweng daripada al-Qur’an dan al-sunnah yang antara implikasinya ialah kemerosotan iman, takwa dan akhlak umat Islam. Meskipun aspek fizikal terutama kemajuan sains teknologi cukup berperanan dalam pembangunan dan ketamadunan umat Islam, namun terdapat ruang yang tidak dapat dipenuhi oleh elemen-elemen lain selain ajaran agama. Mohamad Kamil menekan bahawa Agama menjadi lebih penting kepada kehidupan masa ini yang bertambah moden dan maju, namun dalam masa yang sama seperti kehilangan arah dan panduan langit. Agama perlu bagi melepaskan derita dan kesengsaraan manusia daripada tekanan hidup yang semakin beragam. Kehidupan tidak akan menjadi berkualiti jika manusia tidak ada keimanan dan tidak mengenali diri sendiri. Inilah asas sebenar ketamadunan manusia.

Kerajaan adalah pihak yang berautoriti penuh dalam mentadbir dan mengurus sesebuah Negara. Ia merupakan sebuah instiusi yang dipimpin oleh para pemimpin yang terpilih bagi menjamin kesejahteraan rakyat dan kemakmuran Negara. Kesejahteraan dan kemakmuran dapat diperolehi jika pentadbiran dan pengurusan berjalan dengan adil dan beramanah. Al-Qur’an dan al-Sunnah telah meletakkan tanggungjawab ini ke atas bahu para pemimpin dan ketua sesebuah Negara yang akhirnya dapat membentuk sebuah kerajaan yang adil dan amanah. Mohd. Nakhaie Hj. Ahmad mengulas dengan mantap mengenai pendekatan ‘kerajaan yang adil dan beramanah’ dalam buku ini. Dalam artikelnya beliau telah memfokuskan beberapa isu iaitu ‘teori keadilan dan amanah’ dengan membawakan konsep tersebut menurut beberapa orang failasuf Yunani dan Barat. Kemudian beliau memberi penjelasan

mengenai 'teori keadilan Islam' dengan membawakan penjelasan oleh para ulama Islam. Isu 'amanah dan keadilan' diterangkan dengan mengaitkan antara amanah dengan keadilan yang begitu penting dalam kehidupan yang Islamik, kerana amanah bukan sekadar nilai yang membentuk peribadi mulia, tetapi juga melibatkan kehidupan sebagai anggota masyarakat. Beliau juga mengutarakan isu 'keadilan dan kebebasan' sebagai jawapan kepada persoalan 'adakah keadilan tanpa kebebasan?' dan persoalan 'kebebasan bagaimanakah yang serasi dan menjadi tonggak keadilan?' Ringkasnya persoalan-persoalan ini dihuraikan secara tafsil sekali yang boleh diringkaskan bahawa pembebasan yang hakiki ialah kebebasan yang dikawal oleh wahyu bukan semata-mata oleh akal dan nafsu manusia. Atrikel ini juga memberi huraian tentang 'Islam dan kebebasan' yang menjelaskan konsep sebenar kebebasan yang wajar dipraktikkan oleh manusia sejajar dengan ketamadunan itu sendiri, iaitu yang dipandu oleh al-Qur'an dan al-Sunnah. Dalam membicarakan 'keadilan sosial dalam Islam' tidak hanya menekankan soal upah kepada pekerja sahaja, tetapi ia juga merujuk kepada kebolehan yang berbeza, keadaan persekitaran kerja yang kondusif dan lain-lain. Dalam isu 'kerajaan yang adil dan beramanah' menekan bahawa walaupun memiliki sifat-sifat adil dan bertindak adil itu menjadi kewajiban setiap individu. Namun tuntutan mengamalkan dan menegakkan keadilan oleh kerajaan dalam menjalankan tugas-tugas pemerintahan sejagat diberikan penekanan oleh Islam. Dalam 'kerajaan yang dipilih, kerajaan yang dirampas' memfokuskan bicara kepada aspek kerajaan yang dipilih hendaklah menjalankan amanah dan berlaku adil dalam semua keputusan dan tindakan, disamping mengutarakan syarat-syarat bagi orang yang layak memilih pemimpin dan syarat-syarat orang yang layak dipilih menjadi pemimpin. Selain itu penulis membicarakan aspek 'demokrasi dan keadilan', 'respon pemimpin dan gerakan Islam', 'sistem pembahagian kuasa', 'perkongsian kuasa', 'hubungan antara etnik', ciri-ciri kerajaan yang adil dan beramanah', fenomena Negara yang diperintah dengan adil', dan 'pendekatan Islam Hadhari dan kerajaan adil dan beramanah' sebagai melengkapkan pendekatan 'kerajaan adil dan beramanah'.

Negara Malaysia telahpun meraikan sambutan 50 tahun kemerdekaan daripada penjajah. Persoalannya apakah benar umat Islam hari ini di Malaysia telah merdeka dengan erti katanya sebenarnya? Hakikatnya kemerdekaan bermaksud kebebasan dengan hilangnya kebergantungan kepada selain daripada Allah yang Maha berkuasa. Dalam buku ini, Abd. Manaf Ahmad berusaha untuk menghuraikan persoalan ini apabila beliau membicarakan pendekatan 'rakyat berjiwa merdeka' iaitu prinsip ketiga Islam Hadhari. Dalam pendahulunya beliau menyentuh tentang maksud sebenar kemerdekaan serta sejarah perjuangan menuntut kemerdekaan Negara 50 tahun lalu. Manakala prinsip

'rakyat berjiwa merdeka' dalam pendekatan Islam Hadhari memberi penekanan kepada aspek pembangunan rohani yang menjurus kepada peradaban yang berasaskan pegangan Islam. Menjurus kepada usaha mempertingkatkan mutu kehidupan melalui kebebasan yang menjana pembangunan insan melalui penguasaan ilmu pengetahuan yang tidak lagi dikongkong oleh pengertian yang salah mengenai qada' dan qadar Allah S.W.T. ia juga satu usaha untuk mengikis pegangan bahawa 'rezeki secukup tidak akan jadi segantang'. Maka umat Islam di Malaysia perlu kepada jiwa yang merdeka. Dalam penjelasan penulis mengenai 'rakyat berjiwa merdeka', antara perkara yang disentuh ialah 'kesan penjajahan', erti 'rakyat berjiwa merdeka', 'persaudaraan dan perpaduan sebagai tonggak jiwa rakyat merdeka', 'persaudaraan sesama Islam', 'semangat nasionalisme', 'persamaan hak untuk mendapatkan keadilan', 'persamaan hak mengadu akan penyelewengan undang-undang', 'hak asasi manusia menurut perspektif Islam', 'sejarah kewujudan hak asasi manusia dalam Islam', dan 'pendekatan prinsip rakyat berjiwa merdeka dalam konsep Islam Hadhari'. Kesemuanya digarap bagi menjelaskan peri pentingnya rakyat berjiwa merdeka dalam usaha pembangunan modal insan yang bermotivasi untuk meningkat ketamadunan bangsa dan agama. Rakyat berjiwa merdeka mempunyai signifikan yang penting bagi melahirkan rakyat Malaysia yang menjiwai semangat penubuhan bangsa Malaysia yang bersatu padu, berakhlak mulia dan berdaya saing.

Islam, semenjak penurunan wahyu pertama lagi telah menitikberatkan penguasaan ilmu pengetahuan. Bahkan dari zaman Nabi Adam a.s. hingga ke zaman Nabi Muhammad s.a.w., ilmu pengetahuan menjadi elemen dan syarat penting dalam menjamin ketamadunan dan kemajuan sesuatu bangsa. Kini signifikannya lebih menonjol dengan kemunculan ilmu pengetahuan moden dan keadaan lebih mencabar. Umat Islam mempersiapkan diri dengan ilmu pengetahuan yang berdaya saing dan seimbang dunia dan akhirat. Rahimin Affandi Abd. Rahim mengupas pendekatan 'penguasaan ilmu pengetahuan' dalam konsep Islam Hadhari dengan panjang lebar. Huraian beliau dimulai dengan 'maksud prinsip penguasaan ilmu pengetahuan', diikuti dengan 'takrif ilmu pengetahuan' dengan kupasan ayat al-Qur'an al-Karim dan pandangan ulama mengenainya. Beliau juga menekankan 'elemen terpenting untuk penguasaan ilmu', 'aspek kecemerlangan asas', aspek pelengkap kecemerlangan', 'ilmu sebagai teras terpenting agama Islam', 'falsafah penguasaan ilmu pengetahuan mengikut perspektif Barat dan Islam', 'perbandingan falsafah Keilmuan Islam dan Barat', 'konsep dan aplikasi prinsip ilmu pengetahuan dalam gagasan Islam Hadhari', dan sifat kewaspadaan terhadap elemen kegagalan gagasan Islam Hadhari di Malaysia'. Rumusan yang dapat diambil daripada perbincangannya ialah bahawa umat Islam perlu mengamalkan pendekatan proaktif kearah menghidupkan budaya ilmu dalam

kehidupan mereka. Dengan ini umat Islam dapat mengelak daripada bencana kejahatan kerana '*kejahilan adalah punca segala kejahatan*'.

Aidit Ghazali dalam huraian tentang pembangunan ekonomi seimbang dan komprehensif, telah memulakan bicara dengan menyentuh 'faktor-faktor yang mempengaruhi kemajuan' yang antara lainnya ialah berkat Ilahi, usaha yang gigih dan bijaksana, pertahanan yang kukuh terhadap ancaman dalam dan luaran, perancangan teliti dan lengkap secara berterusan dan peningkatan standard pencapaian, khazanah ilmu dan tahap kemahiran. Beliau juga menekankan 'kedudukan pembangunan ekonomi dalam konteks pembangunan dan tamadun', dan 'pengertian ekonomi seimbang dan komprehensif'. Antara ciri-ciri seimbang menurut beliau ialah adanya unsur-unsur berikut; manfaat dunia dan akhirat, unsur rohani dan jasmani, pengejaran material dan akhlak mulia, rancangan jangka panjang dan pendek dan lain-lain. Selain itu beliau juga menekankan 'pakej ekonomi seimbang', 'halangan-halangan pada pengekaln kebaikan dalam pembangunan ekonomi', 'kategori penggerak-penggerak utama dalam pembangunan ekonomi', 'konsep korporat Melayu', 'keadilan ekonomi untuk semua', dan 'contoh-contoh klasik usahawan Muslim berjaya'. Setiap yang dibincangkan oleh penulis dalam topik ini membantu memberikan ilham, panduan dan motivasi kepada rakyat Negara ini, khususnya umat Islam, dalam usaha mencapai kemajuan dan ketamadunan dalam aspek ekonomi yang pada umumnya masih ketinggalan berbanding dengan umat dan bangsa selain Islam.

Aspek kehidupan berkualiti merupakan asas kepada binaan sikap positif yang seharusnya menonjol dikalangan umat bertamadun. Oleh itu Ahmad Syahir Sarani menghuraikan pendekatan 'kehidupan berkualiti' dalam konsep Islam Hadhari dengan mendatangkan signifikannya daripada berbagai sudut. Beliau turut menekankan tentang 'konsep kehidupan berkualiti' pada awal pembicaraanya, diikuti dengan 'kualiti hidup perspektif Islam' yang antara lain memfokuskan tentang tujuan kehidupan, penyempurnaan misi hidup, tuntutan membina kehidupan dan lain-lain. Selain itu penulis turut menghuraikan 'kualiti hidup persepektif barat', 'perbandingan perspektif Islam dan barat', 'komponen kualiti hidup', 'agama dan pembangunan insan', 'pendidikan', 'kesihatan', 'kehidupan berkeluarga', 'pendapatan dan pengagihan', 'pengangkutan dan komunikasi', 'perumahan', 'alam sekitar', 'penyertaan sosial', 'keselamatan awam', dan 'kebudayaan dan hiburan' sebagai elemen-elemen penting dalam misi meningkatkan kualiti hidup untuk mencapai ketamadunan insan.

'Pembelaan hak kumpulan minoriti' dalam pendekatan Islam Hadhari dihuraikan oleh Abdul Latif Samian dan Nazri Muslim. Penulis memulakan pembicaraan dengan menekankan bahawa setiap insan yang dilahirkan

mempunyai hak-hak asas untuk meneruskan kehidupannya di muka bumi ini, iaitu hak untuk hidup normal. Berikutnya mereka memperkatakan ‘pandangan Islam tentang kumpulan minoriti dalam kontek Islam Hadhari’, dan ‘keadilan dan kesamarataan dalam Islam’. Juga diterangkan golongan yang termasuk ke dalam ‘kumpulan minoriti’ yang antara lainnya ialah ‘orang asli’, ‘orang kurang upaya (OKU)’, ‘orang sakit kronik’, ‘saudara baru’, ‘golongan kurang diwakili’, ‘penganut agama bukan Islam’. Semua kumpulan ini mendapat pembelaan yang sewajarnya dalam ajaran Islam pada zaman Rasulullah s.a.w. dan pembelaan ini diteruskan dan dimantapkan dengan pelaksanaan Islam Hadhari.

Nik Safiah Karim menyempurnakan pendekatan ketujuh dalam konsep Islam Hadhari iaitu ‘pembelaan hak wanita’. Beliau memulakan pembicaraan dengan menegaskan tentang ‘pembelaan wanita dalam Islam’ telah wujud sejak wahyu diturunkan. Ini terbukti dengan terdapat ayat-ayat al-Qur’an dan Hadith yang menjurus kepada pembelaan wanita. Menyambung pembicaraan, beliau mendedahkan tentang ‘demografi’ penduduk Malaysia berdasarkan jantina, ‘pendidikan’ yang ditekankan oleh Islam, ‘wanita dan ekonomi’ yang memainkan peranan dalam pembangunan sesebuah keluarga dan Negara, ‘masalah yang dihadapi oleh wanita Malaysia’ dalam berbagai aspek berserta dengan statistik berkenaan, ‘jentera kerajaan bagi menangani hal ehwal wanita’ dengan menumpukan kenyataan usaha kerajaan dan NGO membantu golongan wanita, ‘jentera kerajaan pertama di Malaysia’ yang bertanggungjawab menjaga hal ehwal wanita, ‘Dasar Wanita Negara’ yang memperjuangkan kedudukan wanita dalam berbagai aspek dengan sewajarnya di Malaysia, ‘Kementerian Pembangunan Wanita, Keluarga dan Masyarakat’ sebagai jentera khusus menangani kebajikan wanita Negara, dan ‘kerjasama dengan NGO’ sebagai mengakhiri penghuraian pendekatan Hadhari dalam membela wanita.

‘Keutuhan Budaya’ dikupas oleh Zainal Kling dengan menjelaskan bahawa kebudayaan adalah isi dan kandungan masyarakat. Kedua-dua, iaitu kebudayaan dan masyarakat adalah satu kesatuan. Beliau menjelaskan ‘konsep masyarakat dan kebudayaan’, ‘sistem kemasyarakatan dan keutuhannya’, ‘pembudayaan dan pemasyarakatan’, keutuhan kandungan budaya’, ‘konflik dalam masyarakat’, dorongan pembinaan peradaban Islam’, ‘keagungan tamadun Islam’, dan akhirnya tentang ‘peribadi dan akhlak individu’. Beliau menutup pembicaraan dengan menegaskan bahawa Islam mengajar setiap individu bahawa manusia adalah umat yang satu, walaupun terdapat pelbagai bangsa dan kaum di dunia. Atas kepelbagaian, manusia memerlukan ajaran dan petunjuk supaya dapat meluruskan perjalanan kepercayaan dengan iman terhadap Tuhan. Menjadi tugas manusia Muslim yang dianugerahkan kekuatan Ilahiah serta akal dan fikiran

untuk mencipta tamadun berlandaskan Islam demi kesejahteraan sesama ummah dan seluruh manusia.

Hashim Hj. Musa melengkap pendekatan kelapan dalam konsep Islam Hadhari iaitu keutuhan moral. Beliau menegaskan bahawa moral dan etika yang mulia merupakan fabrik dan unsur tenunan yang menjana dan membina sesebuah tamadun manusia. Seterusnya beliau mengupas perkara-perkara mengenai 'takrif dan pengertian moral serta kaitannya dengan konsep nilai, etika dan akhlak', 'kelakuan yang bermoral dan beretika dari sudut pandangan umum dan Islam', 'Isu dan gejala moral dan etika yang utama yang mencabar umat manusia dan masyarakat Malaysia kini', 'pendidikan Islam: pemupukan nilai moral, prinsip etika dan akhlak yang mulia melalui penyemaian adab', 'konsep budi dan adab dalam penyemaian nilai moral, prinsip etika dan akhlak yang mulia: warisan masyarakat melayu', 'peranan moral, etika dan akhlak sebagai tenunan fabrik yang membentuk tamadun atau peradaban manusia', 'Islam Hadhari menjana dan mengukuh keutuhan moral, dan 'etika dan akhlak dalam rangka pembinaan sebuah tamadun Malaysia'. Akhirnya beliau menyimpulkan bahawa tanpa keutuhan moral, etika dan akhlak maka segala amanah, tanggungjawab, kedudukan, pangkat, ilmu pengetahuan, sains dan teknologi, kekayaan dan kebendaan akan dieksploitasi dan disalahgunakan demi kepentingan diri sendiri, keluarga, kaum atau kumpulannya semata-mata, melahirkan gejala durjana seperti korupsi, kronisme, kolusi, perkauman, ekstremisme, cauvinisme, fanatisme dan seumpamanya.

Mohd. Hazaim Shah Abdul Murad dan Mohd. Zuhdi Marsuki menulis tentang 'etika alam sekitar menurut perspektif Islam'. Dalam pendahuluannya, penulis menegaskan bahawa Islam menganjurkan hubungan yang betul di antara Tuhan, manusia dan alam sekitar, maka tidak wajar manusia mengabaikan tanggungjawab yang telah diberikan. Beliau turut menghuraikan isu-isu 'peranan akidah dalam pemuliharaan alam sekitar', 'peranan syariah dalam pemuliharaan alam sekitar', dan 'pandangan sarjana-sarjana Islam mengenai alam sekitar: sekularisma, Islam dan alam sekitar'. Tidak bermakna ketamadunan sesuatu bangsa sekiranya mereka mengabaikan pemuliharaan alam sekitar, kerana konsep ketamadunan itu sendiri merangkumi pemuliharaan alam sekitar ciptaan Allah.

'Pendekatan kekuatan pertahanan' dalam konsep Islam Hadhari dikupas oleh Jamil Khir Hj. Baharom. Beliau menekankan dalam permulaan tulisannya dengan menegaskan bahawa elemen kekuatan pertahanan sebagai lambang sesebuah Negara yang berdaulat. Ia juga menjadi aspek penting dalam merealisasikan kedaulatan dalam usaha menjaga nilai-nilai maruah diri, nyawa, harta benda dan kesucian agama daripada dinodai oleh anasir-anasir jahat. Seterusnya penulis

membicarakan perkara-perkara tentang ‘dasar pertahanan negara’, ‘program kerjasama di bawah dasar pertahanan negara’, ‘sains dan teknologi pertahanan’, ‘projek-projek R&D pertahanan di bawah RKM-8’, ‘keupayaan teknologi stride’, ‘industri pertahanan’, ‘Islam adalah agama kedamaian’, ‘peraturan dan etika peperangan’, ‘kepentingan kekuatan pertahanan kepada ummah’, ‘konsep kekuatan pertahanan’, ‘objektif kekuatan pertahanan’, ‘dimensi pertahanan Islam’, ‘prasyarat pertahanan Islam’, ‘paksi kekuatan pertahanan’, ‘kekuatan awam dan nasional’, ‘sebab-sebab pertahanan’, ‘keistimewaan pertahanan Islam’, ‘kemenangan dan kekalahan’, ‘objektif kepimpinan tentera’, ‘definisi strategi pencegahan’, ‘jenis-jenis pencegahan’, ciri keistimewaan pencegahan dalam Islam’, ‘rukun strategi pencegahan Islam’, dan akhir sekali tentang ‘kesan kekuatan pertahanan kepada ummah’.

Islam Hadhari: Pendekatan Pembangunan Peradaban telah menggarap dengan baik dan jelas sepuluh prinsip Islam Hadhari, kerana penulis berwibawa dalam topik yang dibincangkan. Buku ini dijangka boleh memberi perangsang kepada sarjana dan penyelidik untuk melakukan penyelidikan lapangan mengenai pencapaian sebenar umat Islam, dalam dan luar Negara, dalam segenap aspek ketamadunan. Insya Allah.

Prof. Dr. Jawiah Dakir
Institut Islam Hadhari,
Universiti Kebangsaan Malaysia
jawiah@pkrisc.cc.ukm.my